

MPMMN rangka strategi sedia, laksana 500,000 unit rumah mampu milik

Oleh Mohd Nasaruddin Parzi - Februari 10, 2022 @ 6:41pm
bhnews@bh.com.my



Ismail Sabri (kanan) mempengerusikan Mesyuarat Majlis Perumahan Mampu Milik Negara (MPMMN) secara maya, hari ini.

KUALA LUMPUR: Majlis Perumahan Mampu Milik Negara (MPMMN) akan merangka strategi penyediaan dan pelaksanaan 500,000 unit rumah mampu milik di seluruh negara, kata Perdana Menteri, Datuk Seri Ismail Sabri Yaakob.

Beliau berkata, strategi itu akan dilaksanaka sepanjang tempoh Rancangan Malaysia Ke-12 (RMK-12) membabitkan kerajaan Persekutuan, negeri dan pemaju perumahan swasta.

"Mesyuarat hari ini bersetuju menetapkan hala tuju baharu Program Perumahan Rakyat (PPR) yang mengambil kira keperluan semasa serta memasukkan komponen baharu ke arah menjayakan agenda Malaysia Berdaya Huni.

"Pembinaan PPR baharu akan mengambil kira elemen keterhubungan dan akses internet seperti 'fibre to the home' (FTTH), jaringan hubungan pengangkutan awam serta reka bentuk yang lebih ekonomik dan lebih selesa," katanya dalam kenyataan.

Mesyuarat MPMMN berlangsung dalam talian, turut dihadiri Menteri-Menteri Besar dan Ketua-Ketua Menteri, Menteri-Menteri Kabinet, Ketua Setiausaha Negara serta Gabenor BNM.

MPMMN adalah platform membincang dan menyelaras hala tuju perancangan, pelarasan serta pemantauan bagi penyediaan rumah mampu milik di seluruh negara selaras matlamat 'Satu Keluarga Satu Rumah'.

Ismail Sabri berkata, kerajaan komited memastikan penyediaan kediaman yang mencukupi, berkualiti dan mampu dimiliki bagi memenuhi keperluan penduduk yang semakin bertambah.

Katanya, Kementerian Perumahan dan Kerajaan Tempatan (KPKT) memperkenalkan kempen pemilikan rumah, 'Home Ownership Programme' (HOPE) bagi melihat ekosistem yang lebih menyeluruh dalam penyediaan dan pembentukan perumahan serta program yang dapat membantu Keluarga Malaysia dalam memiliki rumah.

Perdana Menteri berkata, Bank Negara juga diminta melihat kembali model pembiayaan perumahan supaya institusi kewangan memudahkan pinjaman perumahan bagi golongan B40 dan M40.

"Kerajaan Persekutuan akan memberi subsidi dan kerajaan negeri menyediakan tanah, manakala bank mempermudahkan pembiayaan bagi memastikan harga rumah PPR dan rumah mampu milik dapat dijual dengan harga yang berpatutan.

"Kerajaan komited menyediakan rumah mampu milik untuk generasi muda selain memberi tumpuan kepada pembinaan rumah mampu milik di bandar kecil dan pinggir bandar untuk meningkatkan peluang golongan M40 membeli rumah," katanya.

MESYUARAT MAJLIS PERUMAHAN MAMPU MILIK NEGARA ►►►

◆ Mesyuarat menetapkan hala tuju baharu PPR yang:

- Mengambil kira keperluan semasa
- Memasukkan komponen baharu ke arah menjayakan agenda Malaysia Berdaya Huni / *Liveable Malaysia*

Turut dibincangkan:

- Strategi penyediaan & pelaksanaan 500,000 unit rumah mampu milik sepanjang RMK12
- Melihat kembali model pembiayaan bagi memudahkan golongan B40 & M40 memiliki rumah PPR/ mampu milik

Merealisasikan matlamat Satu Keluarga, Satu Rumah dengan:

- 1 Pemberian subsidi oleh Kerajaan Persekutuan
- 2 Penyediaan tanah oleh Kerajaan Negeri
- 3 Kemudahan pembiayaan oleh bank

- Penyediaan rumah mampu milik untuk generasi muda
- Tumpu pembinaan rumah mampu milik di bandar kecil & pinggir bandar
- Tingkatkan peluang golongan M40 membeli rumah
- Cadangan membuka permit import bagi tangani kos bahan binaan yang tinggi & isu penggunaan kartel industri pembinaan

**PPR - Program Perumahan Rakyat
RMK12 - Rancangan Malaysia Ke-12
B40 - Golongan berpendapatan rendah
M40 - Golongan berpendapatan sederhana**

Sumber: Perdana Menteri Datuk Seri Ismail Sabri Yaakob

Diterbitkan: 10 Feb 2022
Infografik Bernama

Intipati Mesyuarat Majlis Perumahan Mampu Milik Negara